

1 TESARONIKA

Poru Gigirum Meuma Desiroma Tesaronika Igiyawa Munan Tenewa

1 ¹“Poru, Sairas ge Timoti gumbo, Tesaronika siosi me Mamunwa God ge Ayapan Iesu Keriso danave wakeyanawa yenan teete. God ano oraiwa meuma ge yum ye guniyap.

Tesaronika Igiyawa Anotumat Muma Oya Gaun Veme

²Ye undag yenan nu evedni God gumbe gaun vete. Sira nun numa danave yenan anoete. ³^bNu evedni Mamunwa God namive yenan imug teg anoete. Nau yeuma anotumat gumbe, nau yeuma baigan gumbe sira ye Ayapan numa Iesu Keriso danave owanowan gumbe iyai wakeenewa.

⁴Tatangwanen, God baigan yennewa. Nu anotu me wagomi yenne.

⁵^cKuiyawa gae oraiwa numa ye guniyap uwanewa, gae mekut onan, yusiwa ge Guwawa Iyakaisiyapama ge anotumat yusipam gaibu. Nu ye yapeyap yenan oya aninin wakeetewa ye anoene. ⁶^dDanadawai kokavit auyana. Megara, ye Guwawa Iyakaisiyapama degadegaeba gumbe gae auyana, sira ye Ayapan ge nu minun ene. ⁷At Masedonia ge Akaia apa anotumat igiyawa undag munan oya ye guwaguwawa oraiwa ayana. ⁸Ayapan gaiyawa ye guniyap dauwag at Masedonia ge Akaia umne. Sira at Masedonia ge Akaia mukut onan, God gumbe anotumat yeuma at ampa ampa undag anoya. Meoya nu divi da anin den wata. ⁹Iyayapan upeba umum veme, ye aninin nu aununiyana, sira ye aninin god ugaugaeba yankweg tobiroriyag God wakeiviwa ge natawa ankwatave nau ene, ¹⁰sira ye aninin Usiwa kwimin apa ontanwa oya amarene. Me Iesu. God me boriruwayawa igiyawa gumbo warinamne sira inaine, me nu God danapiri meuma oniviwa gumbe waita numpe.

^a 1:1 Apa 17:1-9 ^b 1:3 1Ko 13:13; 1Ko 1:4-6 ^c 1:5 1Ko 2:4-5 ^d 1:6 Apa 17:5-9

Poru Nau Meuma At Tesaronika Apa

2¹Tatangwanen ye yaug anoene, amdau numa ye guniyap me gwambe onan. ²^eYe yaug anoene, namu danadawai koka ge ubmam at Piripi apa autu, megara God numa waita gumbe God gae oraiwa meuma danadawai kokawa danave ye guniyap yusipamit di watu. ³Nu watuwa me anopipanum onan, me nu danunwa den esine gunup dauwag onnewa onan, sira me uga onan. ⁴^fNu God wat kiniya nunne gae oraiwa amaratan igiyaven atu. Meoya nu iyayapan gumbo den wag degai ata. God gumbe degai ata. God me danunwa yaimoyai yaupe. ⁵Ye yaug anoene, nu gae ube den watu, nu ororog ag tamtan oya gae den watu. God me yaug anone. ⁶Nu iyayapan gumbo waiya den autu, ye guniyap den autu, sira bira da gumbe den autu. ⁷Nu Keriso apasoro meuma. Nu oma ane ye guniyap ibnawa yentu, megara den yentu. Nu ye yapeyap oraivit atu, inawa me ud ususiwa amara munivi mina. ⁸Nu baigan kokavit aiyentu. Meoya nu ye guniyap degadega gumbe keb atan anoete, God gae oraiwa meuma mekut onan, inaiinai numa gaibu. Kuyawa nu baigan numa ye guniyap. ⁹^gTatangwanen, nau yaigipam atan numawa ge mut yusipamit aigimtan numawa ye imug teg anoene. Nu bira da ibnawa wantanwa topai atu. Meoya nu aram ge kum nau ete, God gae oraiwa meuma ye guniyap opata watu.

¹⁰Nu anotumat igiyawa yapeyap waketuwa, nu yaimoyai wakeete God namive, oraivit ge puiyu nuntan mina onan. Ye yangeyap yaununiyana, sira God yangave yaununne. ¹¹^hYe yaug anoene, Mamawa me usitainawa gumbo aiviwa mina nu ye desirom desirom guniyap atu. ¹²Nu wasiwam yenete, wat tuwanete, sira diruete. God toimuwawa ge eyawa danave unigtan oya yenan auwane. Ye inaiinai meib di wakeigimiya.

¹³ⁱMeoya nu gaibu God gumbe gaun evedni vete. Ye God gae meuma nu gunup auyanawa, ye yaug anoyana, me iyayapan gae muma onan, me God gaiyawa. Me ye anotumat igiyawa daneyap nau aivi. ¹⁴^jTatangwanen, God siosi meuma at Judia apa Iesu Keriso danave wakeya. Ye God siosi meuma amave aisiene. Mu Ju igiyawa gumbo danadawai auya. Ebu desiroma meib ye gaibu iyayapan yeuma gumbo danadawai auyana. ¹⁵^kJu igiyawa mu Ayapan Iesu ge propeta guriya boriruwaya. Sira mu nu atatai inuniya dauwag antu. God mu gumbo degadega den ane, sira mu iyayapan undag gumbo anavi aya. ¹⁶Nu Ju onan igiyawa matai waita autan oya gae vete, go Ju igiyawa mu tobot nuniya. Sira ebu meib mu evedni kukaeba muma noidauwag wakene. God danapiri meuma mu gumbo oieba gumbe uwane.

^e 2:2 Apa 16:19-24; 17:1-9 ^f 2:4 Gar 1:10 ^g 2:9 Apa 20:34 ^h 2:11-12 Apa 20:31

ⁱ 2:13 2Te 2:13 ^j 2:14 Apa 17:5 ^k 2:15 Apa 9:23,29; 13:45,50; 14:2,5,19

Poru Me Tesaronika Igiyawa Yawamtan Kokavit Anoivi

¹⁷Tatangwanen, nu ye guniyap kum pipi at ubeube apa waketu.—Ginungunwa garayau den ete, go danunwa me desirom.—Nu yau yemtan kokavit opa di anoete. ¹⁸Meoya nu imunup ye yavetan anoete. Ne Poru ongetan eni, sira amdau duwameba ongetan eni. Go, Seitan tobot nunne. ¹⁹¹Ayapan numa Iesu uwapewa, me namive bira nu owanowan numawa, degadega numawa, waiya waiya keret numawa ape? Me ye. ²⁰Natawa di, ye me eyawa numawa ge degadega numawa.

3 ¹^mMeoya nu oma den ane nu unuwa nikiyag waketu, nu nukut at Asen apa waketu, ²ⁿTimoti barautu aine. Me nu tatan, sira God nauwawa aiviwa. Me Keriso gae oraiwa kep teg wateteyamivi. Me anotumat yeuma oya yusiwa yempe, sira ye ano yutuiwa yempe. ³^oKuiyawa me danadawai kumiwa mame danave bira da danawa den ipunapun atan oya. Ye yembo yang anoyana nu danadawai mame autan oya gae namiven wait nunan wane. ⁴Nu ye guniyap waketu kumiwa apa, nu diruientuwa matai danadawai auta. Natawa di, ye anoyana gare me matadne. ⁵Kuiyawa mameiba oya, nu oma den ane iyai waketu. Anotumat yeuma yang anotan oya me barauna aine. Yen an danadawai aueni. Ye amaorot aumuman, sira nau yaigipam numawa matai wakukampe onanapetan.

Timoti Umum Meumawa Me Poru Yusiwa Wanne

⁶^pMegara Timoti ye guniyap on nu gunup gare mame di uwane. Me anotumat yeuma ge baigan yeuma oya umum oraiwa aug uwane. Me did nunne ye evedni nunan oraivit anoene. Sira, nu ye yau yentan kokavit anoete mina, ye gaibu yau nuntan kokavit anoene. ⁷^qMeoya tatangwanen, nu danadawai ge edawai undag auete, go ye anotumat yeuma gumbe nu watmemeyam nuniyana. ⁸Ye Ayapan gumbe kinkinkin yoigimiya ipewa, gare nu natawa gaibu wakeete. ⁹Nu God numa namive yen an oya degadega ete. Degadega mame undag gumbe aninin God gaun wanton? ¹⁰Nu imunup ye ginenamuiwa yang, anotumat yeuma oya waita yenta, aram kum yusipamit nun yen an vete.

¹¹^rNu imunup Mamunwa God membovit ge Ayapan numa Iesu mu ebu watappeve nu yen an onanta. ¹²Nu imunup baigan guniyap ete mina, Ayapan ape ye yapeyap baigan yeuma sira iyayapan undag gumbo baigan yeuma koka ape noidauwape. ¹³Sira nu imunup, Ayapan numa Iesu me iyakaisi igiyawa undag gaibu uwapewa, ye nonewa ano yusiwa yempe, Mamunwa God namive ye matai pui den yuyempe, ye iyakaisi a yempe.

¹ 2:19 Pir 2:15-16; 4:1; 2Te 1:4 ^m 3:1 Apa 17:15 ⁿ 3:2 Apa 16:1-3 ^o 3:3 2Ti 3:12
^p 3:6 Apa 18:5 ^q 3:7 2Te 1:4 ^r 3:11 2Te 2:16-17

Inainai Me God Watdegayanwa

4 ¹Tatangwanen, oieba, nu Ayapan numa Iesu gumbe yusipamit yenan nun vete. Nu toyau yentu, God degadega atanwa oya ye aninin wakeigimiya. Natawa di, gare ye meis wakeigimiya. Meiba egave egave aigimiya. ²Ayapan Iesu gumbe nu gwangwan divi yentuwa yaug anoene.

³God imive me ye iyakaisi aya. Ye uinantaraki a painau aisiya. ⁴Ye desirom desirom kwapiwa inganit amaratan yaug anoya. Me iyakaisi ape amat yaiyai aigimiya. ⁵Ju onan igiyawa mu God den yaug anoya. Mu uinantaraki eme mina ye den aya. ⁶Mame oya, tateaiwa gumbo kukaeba den aya, sira ugauga den waya. Kuyawa nu wait diruitu sira yusipamit naunewa yutu mina, Ayapan dividivi mame undag matai yusipamit kepte yempe. ⁷God nunan auwanewa nu miyotapam atan oya onan, iyakaisi atan oya. ⁸Meoya, mame waiviwa topai ayawa, me apan den topai ene, megara God me membo Guwawa Iyakaisiyapama yempewa topai ene.

⁹Gare ye tateaiwa gumbo baigan garagara ene. Meoya me gumbe nu gigurum guniyap den teta. God toyau yenne ye desirom desirom guniyap baigan yeuma aya. Ye yembovit God gumbe toyau toyau auyana. ¹⁰Sira natawa, ye at Masedonia undag danave baigan tateaiwa undag gumbo amunene. Nu yusipamit guniyap nun vete baigan egave egave amunigimiya.

¹¹^xNu ano yaigipamit diruitu, yai wakeigimiya. Nau yeuma tamutut aigimiya. Naniyap nau aigimiya. ¹²Meib aigimiya ipewa, ye iyayapan upeba painauwa ebu oraivit toyau muniya. Sira, ye nau oraivit aigimiyawa matai ye oma ape yembovit amaraya.

Ayapan Uwatanwa

¹³Tatangwanen, nu yenan anoete ye iyayapan boriruwayawa munan anoya. Iyayapan upeba owanowan den emewa mu danadawai avieme. Go, ne imunap ye meis den aya. ¹⁴Iesu botog sira inaine me nu anotumat ete, sira nu anotumat etewa Iesu oya boriruwayawa God Iesu gaibu tam ompe. ¹⁵^zAyapan gae meuma gumbe, nu ye guniyap mame diruita. Ayapan uwapewa nu ande vin wakeigimtawa, natawa di, iyayapan boriruwayawa namu yoipe, nu ivi yoita. ¹⁶Noiwa wansin gaibu, aneya kokawa muma noiwa gaibu, God kae trampet meuma uigawa gaibu, Ayapan kwiminu aig ompe. Sira Keriso gumbe boriruwayawa inaig namu yoipe. ¹⁷Meve, nu ande vinag waketuwa wan mu gaibu yunat gwaveru danave toborata, sira piyu ge kwimin yapave Ayapan

^s 4:3 1Te 5:23; 1Pi 1:16 ^t 4:4-5 1Ko 6:13 ^u 4:7 Ibr 12:14; 1Pi 1:15-16 ^v 4:8 Ruk 10:16; 2Ko 1:22 ^w 4:9 Jon 13:34 ^x 4:11 Epe 4:28 ^y 4:14 Rom 14:9; 1Ko 15:3-4,12
^z 4:15-16 1Ko 15:51-52

nun tosata. Nu Ayapan gaibu yaibobot wakeigimta. ¹⁸Meoya gae mame gumbe ye desirom desirom gara watmemeyam aigimiya.

5 ¹Tatangwanen, kum me aniyau nu gigirum yenan den teta, kuiyawa ye me yaug anoene. ²^aYe yembovit yaug anoene Ayapan kumiwa arampuna ub abnawa mina uwape. ³^bIyayapan vemewa, “Yum ge at oraiwa,” amta onan wakukamtanwa uwape. Me vesin bug anewa dawai avivi mina, mu oma den ane ayun watpe.

⁴Megara, tatangwanen, ye sisip danave den wakeyana. Meoya oiyat mame ub abnawa mina ye ape den teraya. ⁵^cYe undag eyawa usitainawa ge oiyat usitainawa. Nu aram ge sisip usitainawa onan. ⁶Meoya, iyayapan upeba mina den kubvinigimta. Nu numbovit yangunwa mereruwape numbovit amarata. ⁷Bira bira kubvinemewa aram kubvinigimpe, sira bira bira yoi yaigipama nemewa aram yoi yaigipama naigimpe. ⁸^dNu oiyat igiyawa. Nu numbovit amarata. Anotumat ge baigan mut beyanawa togunup teta, sira nu owanowan waitawaita mut keretawa kuiyunup tonatta. ⁹God imive mamaib nunan baraune. God danapiri meuma den auta, megara Ayapan numa Iesu Keriso gumbe waita auta. ¹⁰^eAyapan nunan boane. Me nu yangunwa mereruwane ge kubvinetewa, Ayapan gaibu wakeigimtan oya. ¹¹Meoya, gare ye ene mina, ano yusiwa yeuma garagara waita ag anoano yeuma garagara sig doriya.

Toyau Toyau Oieba

¹²Tatangwanen, nu yenan nun vete. Ye yapeyap bira bira nau yaigipam emewa anog auya. Ayapan gumbe namuyoiyai eme gae yusipam diruemewa anog auya. ¹³Nau muma oya baigan gumbe ayamat undag muniya. Ye desirom desirom guniyap yum danave wakeigimiya. ¹⁴^fTatangwanen, nu toyau yenta mamaib aya. Ui irai irai igiyawa gae yusipam dirumiya, a emewa ano yusiwa muniya, yutu onanwa waita muniya, iyayapan undag gumbo yai wakeigimiya. ¹⁵^gYaukapa. Bira da kukaeba gumbe wakepewa kukaeba garawa den ape. Megara ye yapeyap ge iyayapan undag gumbo evedni a ge yaug oravit aigimiya.

¹⁶^hEvedni evedni degadega aigimiya. ¹⁷Nun waigimiya den kweigimiya. ¹⁸ⁱDividivi undag gaun waigimiya. Kuiyawa mame God yenan anoivi Iesu Keriso gumbe.

¹⁹^jGuwawa iyameba den kweya boipe. ²⁰God gaiyawa yai anog amaraya. ²¹^kDividivi undag yangut yauya, sira oravitwa kikikit yumnasiya. ²²Kukaeba gina ubeubewa undag kweg painau aisiya.

^a 5:2 Mat 24:42-43; 2Pi 3:10; Rev 3:3 ^b 5:3 Mat 24:39; Ruk 21:34-35 ^c 5:5 Rom 13:12

^d 5:8 Ais 59:17; Epe 6:14,17 ^e 5:10 Rom 14:8-9; 1Te 4:14 ^f 5:14 2Te 3:6,11

^g 5:15 Rom 12:17; 1Pi 3:9 ^h 5:16 Pir 4:4 ⁱ 5:18 Epe 5:20 ^j 5:19 Epe 4:30

^k 5:21-22 1Jn 4:1

²³^lGod yum tuiviwa, me membovit ye aiyempe di iyakaisi aya onanape. Ye guwewa ge nonemagewa ge kwapuiwa undag amara yempe. Ayapan numa Iesu Keriso uwapewa, ye pui den auya. ²⁴Yenan auwanewa me ano amat oraiwa abnawa, meoya me oma ane yenan ape.

²⁵^mTatangwanen, nunan nun waigimiya. ²⁶Tateaiwa undag gumbo iyakaisi gumbe noi tog kaiwa kaiwa waya. ²⁷Ayapan gumbe ne diruitna. Gigirum mame basiya, tateaiwa undag anope.

²⁸Ayapan numa Iesu Keriso ano oraiwa ye guniyap wakeigimpe.

^l 5:23 2Te 3:3 ^m 5:25 1Ko 4:3; 2Te 3:1